

Oleh : DATUK SERI SYED HAMID ALBAR
Tempat : UNIVERSITI KEBANGSAAN MALAYSIA, BANGI
Tarikh : 24 JUN 2003
Tajuk : UCAPAN SEMPENA WACANA ILMIAH SIRI KEDUA ISU
ANTARABANGSA

"PERANAN MALAYSIA DI ARENA ANTARABANGSA"

Y.Bhg. Prof. Dato' Dr. Mohd Salleh Mohd Yassin
Naib Canselor
Universiti Kebangsaan Malaysia

Y.Bhg. Prof. Dato' Dr. Mohammad Noor Embi
Timbalan Naib Canselor Hal Ehwal Pembangunan
Universiti Kebangsaan Malaysia

Y.Bhg. Prof. Dr. Md. Ikram bin Mohd Said
Timbalan Naib Canselor Hal Ehwal Akademik
Universiti Kebangsaan Malaysia

Y.Bhg. Prof. Madya Dr. Idris bin Zakaria
Pengetua Kolej Keris Mas
Universiti Kebangsaan Malaysia

Pegawai-Pegawai Kanan Universiti

Y.Bhg. Prof. Dekan-Dekan Fakulti

Pensyarah-Pensyarah

Pengetua-Pengetua Kolej, Felo-Felo

Ahli Jawatankuasa Kebajikan Pelajar Kolej Keris Mas

Ketua-Ketua Kelab Aspirasi Kolej-Kolej Kediaman

Tuan-Tuan/Puan-Puan

Saudara-Saudara/Saudari-Saudari Mahasiswa yang dikasihi

ASSALAMUALAIKUM WARAHMATULLAHI WABARAKATUH

Saya memanjat kesyukuran ke hadrat Allah S.W.A kerana dengan limpah kurniaNya, saya dapat bersama-sama Tuan-tuan/Puan-puan di dalam Majlis Wacana Ilmiah Siri Kedua Isu Antarabangsa. Saya ingin mengucapkan terima kasih kepada pihak penganjur yang telah mengundang saya untuk menyampaikan Ucaptama dan

memandangkan kepada skop Wacana ini, saya akan memberi tumpuan Ucaptama saya di atas tajuk "Dasar Luar dan Peranan Malaysia di Arena Antarabangsa".

2. Malaysia pada masa ini, bukan lagi sebuah negara "kerdil" dan "terpencil" di pentas antarabangsa. Kita telah melangkah jauh melewati sempadan sendiri dalam memainkan peranan kita di arena antarabangsa. Dasar luar negara yang dulunya hanya menekankan kepada menjalinkan hubungan dua hala bertujuan mewujudkan "kawan" (friends) dan berbaik-baik dengan negara-negara luar, kini telah bertukar corak dan pendekatan. Perubahan kepada corak dan pendekatan yang kita alami pada masa ini adalah sejajar dengan pekembangan dunia semasa yang memerlukan kerajaan dan kepimpinan negara mengambil tindakan dan pendekatan yang lebih terserlah di peringkat antarabangsa.

3. Hari ini, kita dapat berdiri sama tinggi dan duduk sama rendah dengan negara-negara maju dunia. Kita bebas dan bermaruah. Kita tidak rasa tersisih ataupun diketepikan oleh masyarakat dunia. Suara kita terus terdengar di persada antarabangsa dan dihormati oleh masyarakat antarabangsa. Banyak negara-negara yang sedang membangun begitu tertarik dan menyanjung tinggi dasar luar kita yang pragmatik. Penglibatan serta peranan negara di peringkat antarabangsa, ini dapat dilaksanakan kerana dasar luar kita yang mantap, tidak liar dan berasaskan nafsu.

4. Kita juga sentiasa komited dan tidak berubah meskipun berhadapan dengan tekanan yang kuat dari negara-negara besar. Malahan, kini negara-negara atau individu yang mengutuk kita dahulu telah mengakui bahawa tindakan dan polisi kita dalam menangani isu-isu yang berkepentingan kepada negara adalah tepat dan wajar. Contohnya, pendirian kita terhadap pencerobohan Amerika Syarikat dan sekutunya terhadap Iraq. Kita menentang pencerobohan kerana itu bukanlah jalan yang wajar bagi menangani masalah di Iraq. Kita menentang dengan keras "regime change" kerana ia suatu pendekatan yang berbahaya kepada negara-negara membangun khususnya. Kita tidak bersetuju sesebuah negara lain menetapkan keutuhan dan kedaulatan sesebuah negara. Ianya hendaklah ditentukan oleh rakyat negara itu sendiri. Suara kita yang tegas dan konsisten telah penentangan kita ini, mendapat sanjungan dan kita dihormati masyarakat antarabangsa.

5. Kita perlu ingat, setiap perubahan yang berlaku mesti ada sebabnya. Oleh yang demikian, perlakuan, tindakan dan peranan kita di pentas antarabangsa bukanlah dilakukan tanpa rasional yang kukuh. Kita mengambilkira beberapa elemen khususnya, kepentingan negara dan sejagat bagi memastikan kestabilan dan keamanan dunia terus dipelihara. Ini adalah kerana dunia masa kini tidak lagi membolehkan mana-mana negara wujud terasing dan bersendirian. Dunia globalisasi memaksa kita menerima hakikat bahawa kita merupakan sebahagian daripada rantau dan dunia yang luas. Kita sendiri sedar di mana sesuatu yang berlaku di negara yang jauh masih boleh mengganggu gugat kesejahteraan kita baik dari segi politik atau ekonomi. Justeru, amat malang sekiranya kita membiarkan hala tuju negara ditetapkan oleh pihak asing. Kita harus berupaya menangani isu-isu yang timbul dan meminimalkan pendedahan kepada ketidakstabilan dan ketidakpastian dunia. Di dalam hal ini, dasar luar negara yang pro-aktif dan bervisi adalah mustahak untuk menjamin kepentingan dan kedaulatan negara.

Evolusi Dasar Luar Negara

6. Dasar luar negara kita telah melalui proses evolusi yang dinamik sejak kemerdekaan, yang mempamerkan keadaan dan keperluan semasa dan juga corak pemerintahan Perdana Menteri pada masa itu.

7. Di bawah Tunku Abdul Rahman, Perdana Menteri Malaysia yang pertama, Kerajaan mengamalkan dasar luar yang pro-Barat, anti-komunis, anti-Israel, dan anti-apartheid. Tahun-tahun awal kemerdekaan juga menyaksikan negara menjadi anggota Pertubuhan Bangsa-Bangsa Bersatu (PBB), Five Power Defence Arrangements (FPDA) dan Komanwel. Malaysia juga merupakan salah sebuah negara pengasas Pertubuhan Asia Tenggara (ASA) pada tahun 1961 dan kemudiannya ASEAN pada tahun 1967.

8. Di bawah Perdana Menteri kedua, Tun Abdul Razak, Malaysia mula memberi penekanan kepada dasar berkecuali (non-aligned) dan telah menjadi ahli Pergerakan Negara-Negara Berkecuali (NAM) pada tahun 1970. Malaysia juga mengamalkan sikap terbaik-baik dengan semua negara tanpa mengira kefahaman dan ideologi. Hubungan diplomatik dijalinan dengan China dan negara-negara Indochina di samping meningkatkan kerjasama ASEAN. Pada masa yang sama, Malaysia memberi penekanan kepada konsep Zon Aman, Bebas dan Berkecuali (ZOPFAN) dan South East Asia Nuclear Weapon Free Zone (SEANWFZ).

9. Perdana Menteri ketiga, Tun Hussein Onn, pula memberi penekanan kepada urusan serantau. Di bawah Tun Hussein, Malaysia telah meneruskan kerjasama ASEAN dan ZOPFAN, dan hubungan dua hala di kalangan negara-negara rantau ini dipertingkatkan.

10. Selama 22 tahun di bawah pucuk pimpinan Dato' Seri Dr. Mahathir Mohamad pula, Malaysia bersikap pragmatik dan mula mengambil kira faktor-faktor yang mempengaruhi iklim politik, keselamatan serta pembangunan sosial dan ekonomi yang memanfaatkan Malaysia. Kerjasama dalam konteks ASEAN, Kerjasama Selatan-Selatan (LID, SAID), NAM, Komanwel, OIC, D8 dan G15 terus dipertingkatkan dan Malaysia juga mula memainkan peranan yang lebih aktif dalam PBB. Sebagai contoh, sejak tahun 1981, Malaysia telah dua kali mengambil tempat di Majlis Keselamatan (MK) PBB, iaitu pada tahun 1988-1989 dan 1999-2000. Tahun 1996 pula menyaksikan Tan Sri Razali Ismail, Wakil Tetap Malaysia ke PBB, dilantik sebagai Presiden Perhimpunan Agung PBB Sesi ke-51 dan sekarang ini memainkan peranan sebagai Utusan Khas PBB ke Myanmar.

11. Tuan-tuan pasti bersetuju bahawa secara amnya, Malaysia lebih berkeyakinan dan berani menyatakan pendapat serta kedudukannya di arena antarabangsa mengenai pelbagai isu semasa dunia. Bukan sahaja kepentingan negara kita sahaja yang diketengahkan, pendirian dan kepentingan negara-negara membangun dari

Selatan dalam menangani isu-isu seperti demokrasi, hak asasi manusia dan alam sekitar juga diketengahkan.

12. Jelas bahawa Malaysia menyedari akan betapa pentingnya negara memainkan peranan yang pro-aktif di arena antarabangsa. Malaysia kini tidak lagi segan atau khuatir untuk menyuarakan pemikirannya kepada dunia luar. Bahkan, kita menanam semangat dan bertekad untuk memaju serta mempertahankan kedudukan negara apabila perlu dan sebaik mana mungkin di arena antarabangsa. Sebagai sebuah negara dagang, Malaysia amat bergantung kepada iklim ekonomi global yang stabil lebih-lebih lagi dalam kita mengharungi proses globalisasi yang serba mencabar ini. Malaysia yang berusaha giat dengan negara-negara ASEAN berjaya mewujudkan persekitaran geo-politik yang boleh menjamin kestabilan dan kemakmuran rantau ASEAN bagi membangunkan rantau ini.

ISU-ISU SEMASA

13. Setelah kita menyingkap perkembangan dasar luar Malaysia di bawah empat Perdana Menteri semenjak kemerdekaan, saya akan menyentuh beberapa isu antarabangsa semasa yang penting kepada kita di mana Malaysia telah memainkan peranan dan membuat sumbangan demi menjamin kestabilan dan keamanan rantau dan dunia. Ini secara langsung juga telah menyumbang kepada kestabilan dan pembangunan negara.

ASEAN

14. Peranan Malaysia didalam ASEAN adalah bukti jelas di mana kita telah dapat membuat sumbangan yang konkrit dalam membawa keamanan, kemakmuran serta kemajuan ekonomi yang pesat kepada rantau ASEAN dan juga negara. Kita tidak boleh membelakangkan ASEAN dan ia perlu terus menjadi tunggak penting kepada dasar luar negara walaupun anggota ASEAN, kadangkalanya tidak sehaluan didalam menangani beberapa isu antarabangsa yang timbul dari masa ke semasa.

15. Semenjak penubuhannya, ASEAN telah berkembang pesat dan berpotensi untuk meraih kejayaan yang lebih lagi dalam bidang politik dan ekonomi. Pandangan jauh pengasas ASEAN yang sepakat dalam memajukan ekonomi negara-negara anggota melalui kestabilan politik dan penyelesaian masalah secara aman telah terbukti kesahihannya. ASEAN telah berjaya meraih dividen besar – iaitu keamanan dan kestabilan rantau. Tidak terdapat konflik dalam ertikata penggunaan ketenteraan untuk menyelesaikan masalah duahala sesama negara-negara ASEAN ataupun dengan negara-negara jiran yang lain.

16. Kerjasama dalam bidang politik-keselamatan dan strategik; ekonomi dan kewangan serta fungsional telah membuahkan hasil. Namun, masih banyak cabaran yang menanti ASEAN. Saya percaya dengan komitmen dan kesungguhan untuk terus bersatu, meskipun anggotanya terdiri dari pelbagai fahaman, idelogi bangsa dan agama, ASEAN akan dapat menangani dan mengatasi cabaran-cabaran ini.

Kepelbagaian (diversity) ini dijadikan sumber kekuatannya dan bukan kelemahannya. Bagi Malaysia, ASEAN akan sentiasa menjadi tunggak polisi hubungan luar Malaysia dan kita akan terus memainkan peranan yang bermakna di dalam Pertubuhan tersebut.

Globalisasi

17. Seperti negara-negara lain, Malaysia perlu berhadapan dengan fenomena globalisasi iaitu dunia tanpa sempadan yang wujud akibat kemajuan teknologi komunikasi dan kemudahan perhubungan. Sesetengah pihak bertanggapan bahawa Malaysia tergolong ke dalam kumpulan yang dianggap menentang globalisasi akibat kedudukan yang diambil oleh Malaysia dalam isu spekulasi matawang dan sikap Malaysia menentang penyangak matawang dalam krisis kewangan yang melanda Asia.

18. Kita tahu bahawa pendapat tersebut tidak benar sama sekali. Apa yang kita khuatiri adalah cubaan membawa globalisasi ke satu tahap yang boleh menghakis kebebasan sesebuah negara berdaulat untuk membuat keputusan sendiri dalam melaksanakan agenda negara. Kita percaya bentuknya masih boleh diperbaiki. Oleh itu, di peringkat antarabangsa, Malaysia bersama-sama dengan negara yang sehaluan, terus memperjuangkan kerjasama pembangunan ekonomi antarabangsa berlandaskan kepada prinsip samarata dan keadilan. Kita sering menggesa agar dipertingkatkan bantuan kepada negara kurang membangun, penurunan kadar hutang, pemindahan teknologi dan pengurangan jurang digital serta kaedah perdagangan yang setara. Kesemuanya ini adalah bertujuan untuk mengurangkan jurang di antara negara kaya dengan negara miskin.

19. Dasar memperkayakan jiran (prosper thy neighbour) bagi menggalakkan kerjasama ekonomi di antara Malaysia dengan negara jiran juga telah diperluaskan penggunaannya kepada sektor swasta. Malaysia akan terus mencari usahasama, kesatuan perdagangan dan perkongsian pintar (smart partnership) dengan negara lain di peringkat kerajaan dan swasta bagi mengenalpasti peluang-peluang ekonomi demi keuntungan bersama.

20. Malaysia mahukan globalisasi yang lebih adil dan seimbang yang memberi manfaat kepada semua warga dunia, baik negara kaya mahupun negara miskin. Globalisasi tidak sepatutnya menggugat kedaulatan sesebuah negara dalam hak menentukan dasar dalaman masing-masing. Ia harus dilaksanakan secara berperingkat-peringkat bagi membolehkan negara-negara membangun meningkatkan kedudukan mereka agar mampu bersaing.

21. Oleh itu, amat penting bagi rakyat Malaysia memiliki daya saing yang tinggi, bersedia menghadapi dan menangani segala bentuk cabaran globalisasi. Persediaan ini bukan sahaja sebagai benteng bersaing dengan syarikat-syarikat gergasi dunia, tetapi juga untuk merebut peluang di pasaran antarabangsa yang akan terbuka dengan lebih luas lagi di masa yang terdekat ini.

Keganasan

22. Peristiwa serangan 11 September ke atas AS telah meninggalkan kesan mendalam kepada seluruh penduduk dunia. Malaysia menyertai negara-negara lain dalam mengutuk keganasan kerana ia bukan cara untuk menyelesaikan masalah. Kita tidak menafikan bahawa terdapat banyak ketidakadilan di dunia, dan ini perlu diperbetulkan. Tetapi ia hendaklah diusahakan melalui tindakan yang tidak menjadikan mangsa orang yang tidak bersalah.

23. Dunia harus sensitif dan memberi perhatian kepada ketidakadilan dan penindasan yang berlaku. Keganasan tidak mungkin dihapuskan dengan hanya memburu dan membunuh pengganas. Serangan di Bali, di Riyadh dan di Casablanca baru-baru ini membuktikan bahawa keganasan akan terus menular. Kita telah dari awal-awal lagi melafazkan kebimbangan bahawa kerakusan AS dengan agendanya tersendiri terhadap Iraq akan menyemarakkan lagi sentimen dunia Islam. Selagi ada penindasan dan penaklukan satu-satu kaum oleh kaum dan bangsa lain, akan ada orang yang terdesak dan akan sanggup mengganas. Dunia harus menyelesaikan sebab-sebab mengapa mereka mengganas.

24. Bagi yang ekstrem di dunia Islam, salah satu dorongan utama untuk mengganas adalah sebagai respon kepada tindak tanduk Israel (yang disokong AS) menyerang rakyat Palestin. Selagi sempadan Israel tidak ditentukan dan wilayah Palestin yang dirampas oleh Israel tidak dikembalikan, selagi hasrat Palestin untuk menubuhkan negaranya sendiri tidak kesampaian, keganasan tidak mungkin luput. Kita menerima baik cadangan damai AS baru-baru ini yang lebih dikenali sebagai roadmap memandangkan ianya telah disokong oleh kedua-dua belah pihak. Namun kita masih mengharapkan agar kepentingan negara-negara jiran terdekat seperti Syria dan Lebanon juga diambil kira dalam usaha mencari penyelesaian yang komprehensif bagi konflik Asia Barat tersebut.

25. Dalam dunia dicengkam keganasan, kita perlu bersyukur bahawa Malaysia terus diakui oleh banyak negara dan pihak sebagai sebuah negara Islam 'moderate' yang berpegang teguh kepada kesederhanaan ajaran Islam yang sebenar. Imej Islam yang terjejas dapat dipulih dengan kestabilan, keharmonian antara kaum dan penganut agama yang berlainan serta kemajuan yang ketara di Malaysia. Kita dapat membuktikan bahawa Islam dan demokrasi tidak semestinya bercanggah, malahannya ianya saling menyokong dan 'complimentary'.

Pencerobohan AS dan sekutunya ke atas Iraq

26. Hadirin semua maklum bahawa Malaysia menentang pencerobohan AS tersebut berpandukan prinsip undang-undang antarabangsa dan Piagam PBB. Wajar ditekankan bahawa Malaysia bukan anti-AS. Kita menolak tindakan AS membelakangkan badan dunia itu dalam hal keamanan dan sekuriti antarabangsa. Malaysia berpegang kepada prinsip penyelesaian sebarang pertikaian secara aman

dan menentang sebarang tindakan unilateral. Serangan pre-emptive AS telah membuka landasan yang merbahaya dalam hubungan antara negara.

27. Malaysia telah menyuarakan pendirian kita dengan tegas dan memainkan peranan di peringkat antarabangsa khususnya didalam kapasiti kita sebagai Pengerusi NAM. Ini adalah kerana pencerobohan ke atas Iraq telah membawa beberapa kesan penting terhadap masyarakat antarabangsa dan mengwujudkan dunia yang unipolar yang didokong oleh Amerika Syarikat. Dalam hubungan ini, saya ingin berkongsi pandangan saya terhadap kesan tindakan Amerika itu ke atas: -

Masyarakat Antarabangsa dan Pertubuhan Bangsa-Bangsa Bersatu

28. Pencerobohan ke atas Iraq oleh AS dan sekutunya telah menyebabkan perpecahan antara anggota-anggota masyarakat antarabangsa. Keadaan ini telah meninggalkan kesan yang mendalam terhadap PBB, prinsip-prinsip undang-undang antarabangsa dan sistem multilateralism yang selama ini menjadi tunjang hubungan antara negara. Perkembangan ini boleh membawa kepada ketidakstabilan sistem antarabangsa dan kesan buruk kepada negara-negara kecil seperti Malaysia yang bergantung kepada undang-undang antarabangsa sebagai jaminan keselamatan dan kesejahteraan, baik dari segi politik, ketenteraan mahupun ekonomi. Lebih mengecewakan, PBB dikatakan tidak lagi efektif atau relevan kerana hilang keupayaan untuk bertindak tanpa pengaruh atau desakan kuasa-kuasa besar, terutamanya Amerika Syarikat. Pentadbiran Bush telah menunjukkan dengan jelas bahawa sikap tidak endah terhadap PBB telah menjadi salah satu tunggak dasar luarnya. Ini menyebabkan integriti PBB sebagai badan yang bertanggungjawab ke atas keamanan dipersoalkan dan timbul keraguan terhadap hala tuju PBB di masa depan.

Pergerakan Negara-Negara Berkecuali (NAM)

29. NAM sendiri telah dipecahkan dan tidak sepakat dalam isu Iraq. Semasa Sidang Terbuka Majlis Keselamatan (MK) PBB untuk membincangkan situasi tersebut pada 26-27 Mac 2003, negara-negara NAM mengutarakan pendirian yang berbeza. Ini amat mendukacitakan kita kerana perpecahan ini akan menyukarkan lagi ikhtiar Malaysia untuk menjadikan NAM sebagai sebuah Pergerakan yang dihormati di pentas antarabangsa. Dalam usaha menangani perkembangan tersebut, Malaysia sebagai Pengerusi NAM telah mengambil inisiatif untuk mengadakan Mesyuarat Peringkat Menteri-Menteri Luar Troika NAM untuk membincangkan kedudukan dan masa depan Iraq serta hala tuju NAM di Paris pada 2-3 Mei 2003 lalu.

Kesan terhadap Usaha Menentang Keganasan Antarabangsa

30. Pencerobohan AS dan sekutunya juga telah memberi impak negatif terhadap usaha AS dan masyarakat antarabangsa untuk menentang keganasan antarabangsa. Walaupun pada peringkat kerajaan usaha akan tetap dijalankan seperti biasa, namun kesan negatif akan dirasai pada tahap masyarakat awam, terutamanya di Asia Barat. Sungguhpun demikian, Kerajaan mahukan kerjasama dua hala antara Malaysia dan AS dalam hal ini berjalan seperti biasa.

Kesan Terhadap Sekatan Ke Aras Iraq

31. Penerimaan anggota MK PBB akan Resolusi 1483 bertarikh 22 Mei 2003 yang menggantung kesemua sekatan terhadap Iraq telah sekaligus memberi "kemenangan" bagi AS yang dikatakan telah berjaya dalam usahanya "menyatukan" kembali MK PBB setelah perpecahan sebelumnya. Apa yang kita kawatiri adalah pembatalan sekatan yang bertujuan memberi keuntungan kepada AS kerana hasil penjualan minyak Iraq akan digunakan untuk membiayai pembinaan semula negara tersebut. Walau apa jua bentuk pemerintahan post-war Iraq, AS dijangka akan mendapat 'habuan' (spoils of war) yang besar memandangkan kerajaan baru Iraq akan dipengaruhi oleh AS dan firma-firma AS bersama sekutunya dijangka memonopoli konsesi dalam bidang minyak dan gas.

32. Dalam soal membaik pulih Iraq, Malaysia mahukan PBB diberi peranan utama dan tidak hanya AS dan sekutunya sahaja yang berkuasa mencorak pentadbiran baru di Baghdad. Namun, kita tidak mahu peranan PBB kelak dilihat sebagai mengiktiraf pencerobohan AS ke atas Iraq. Malaysia juga mahukan pembatalan sekatan terhadap Iraq dilakukan berlandaskan prosidur yang sedia ada di MK PBB. Walau bagaimana pun, Malaysia akur dan telah bersedia menerima penggantungan sekatan ke atas Iraq demi ikhtiar membaik pulih serta memberi bantuan kemanusiaan kepada rakyat Iraq.

33. Isu Dunia Unipolar adalah suatu perkara yang telah menarik minat ramai kerana ianya berkait rapat dalam menentukan hala tuju dunia masa depan. Ini adalah suatu perkembangan yang membimbangkan yang mesti dipantau dengan teliti. Kebimbangan kita adalah kerana sebuah dunia bersifat unipolar, dan sikap Amerika Syarikat yang tidak menghiraukan suara masyarakat antarabangsa boleh mengancam negara-negara membangun yang lemah dan kecil. Keadaan ini boleh mendatangkan ancaman kepada kestabilan dunia.

Reaksi AS terhadap Malaysia

34. Saya ingin menyatakan bahawa pihak AS sedia maklum akan pendirian Malaysia dalam isu pencerobohannya ke atas Iraq. Walaupun begitu, kita tetap mempunyai hubungan dua hala yang baik. Kita perlu fahami bahawa perselisihan pendapat antara negara didalam sesuatu isu bukanlah bermakna hubungan perlu diputuskan. Kita bukannya anti-Amerika. Sementara Amerika Syarikat mengiktiraf hak Malaysia untuk menyuarakan pandangannya dan tetapi mereka telah memohon bantuan kita untuk mengurangkan retorik tersebut kerana dikawatiri ia akan menyumbang ke arah sentimen anti-Amerika. Ini menunjukkan pendirian dan peranan kita di peringkat antarabangsa ada kesannya.

34. AS ada menyatakan hasratnya untuk melihat Malaysia, sebuah negara Islam yang moderate serta sebagai Pengerusi NAM, memainkan peranan dalam post-war Iraq termasuk di dalam memberi sokongan dalam bentuk anggota tentera kepada sebuah multinational force (bukan di bawah naungan PBB) ataupun menghantar pasukan polis bagi menjaga ketenteraman awam. Malaysia juga dipohon supaya

bersedia menahan pemimpin Iraq yang ada di dalam senarai orang yang dikehendaki untuk siasatan lanjut sekiranya mereka berada di Malaysia. AS juga menyatakan bahawa syarikat-syarikat Malaysia tidak disenarai-hitamkan dan boleh membuat tawaran untuk kontrak-kontrak membaik pulih Iraq.

35. Dari segi dagangan pula, walaupun hubungan perdagangan Malaysia-AS memanfaatkan kedua-dua belah pihak, sebarang kerenggangan hubungan akibat isu Iraq akan lebih banyak merugikan Malaysia daripada AS. Namun demikian, AS perlu mengambil kira bahawa Malaysia adalah sebuah negara Islam yang moderate dan komited untuk menentang keganasan. Kerajaan juga dalam proses menubuhkan South East Asia Regional Center for Counter Terrorism yang akan berkerjasama dengan banyak negara dalam usaha membendung keganasan. Sekiranya AS menghargai faktor ini, Malaysia akan terus dianggap sebagai rakan pentingnya di rantau ini.

36. Malaysia baru sahaja keluar dari belenggu Krisis Kewangan Asia yang melanda pada tahun 1998. Malaysia harus bertindak secara praktikal demi memelihara kesejahteraan dan kemakmuran negara dan mengelak dari diperangkap oleh AS yang mungkin bertindak drastik lantas memusnahkan ekonomi negara yang baru lepas dari krisis kewangan. Respons setiap negara terhadap peperangan di Iraq ini adalah berdasarkan kepentingan negara masing-masing. Malaysia juga mempunyai kedudukan yang sama.

37. Di samping itu, kita juga perlu sensitif dan berusaha untuk tidak menyinggung perasaan negara-negara Arab tertentu walaupun mereka menyokong AS. Kita tidak mahu menimbulkan reaksi yang boleh menjejaskan kehadiran ketua negara atau kerajaan mereka ke Sidang Kemuncak Pertubuhan Persidangan Islam (OIC) di Kuala Lumpur pada bulan Oktober depan. Sebagai Pengerusi OIC yang akan datang, Malaysia memerlukan sokongan dari negara-negara Teluk khususnya. Oleh yang demikian, Malaysia perlu mengambil jalan tengah serta mengambil pendekatan yang seimbang dalam hubungan kita dengan negara-negara Arab.

Kesimpulan

40. Tatalaku hubungan luar Malaysia setelah hampir setengah abad Merdeka jelas menunjukkan kematangan. Malaysia kini dikenali ramai dan dijadikan sebagai contoh bagi negara membangun. Kita tidak memihak kepada mana-mana blok tetapi berbaik-baik dengan semua negara di dunia. Namun sikap bebas serta keyakinan kita menyuarakan pendapat tentu tidak disenangi oleh sesetengah pihak. Media asing kadangkala berpandangan negatif - imej negara diperburukkan, dan pandangan pelabur dan pelancong terhadap Malaysia cuba dipesongkan. Namun, mereka yang berpeluang datang ke Malaysia melihat dengan mata sendiri betapa tidak tepatnya laporan media terhadap kita dan mereka dapat memperbetulkan imej Malaysia di kalangan rakan dan kenalan mereka.

41. Negara-negara yang sedikit masa dulu mencemuh kita kerana kononnya kita tidak demokratik, tidak adil dan sebagainya, hari ini berusaha memperbaiki hubungan mereka dengan kita. Masalah tertentu sudah tidak lagi disebut oleh mereka.

42. Saya telah menghuraikan sedikit sebanyak mengenai dasar luar dan peranan negara di arena hal ehwal antarabangsa yang mana Malaysia telah memainkan perannya. Saya berharap kita semua akan terus mendokong hasrat kerajaan dalam menangani dasar luar negara supaya keberkesanan pengaruh Malaysia di arena antarabangsa terus kekal dan tidak terpadam. Kita semua bertanggung jawab dan harus memainkan peranan di dalam dunia yang sentiasa berubah dan serba mencabar ini. Malaysia tidak boleh tersisih atau ketinggalan di belakang.

WASSALAMUALAIKUM WARAHMATULLAHI WABARAKATUH.